

生死比丘是。爾時諸比丘。聞佛所說。歡喜奉行。

九六、長者身體生瘡緣

佛在舍衛國祇樹給孤獨園。時彼城中有一長者。財寶無量。不可稱計。選擇高門。娉以為婦。種種音樂。以娛樂之。足滿十月。產一男兒。身體有瘡。甚患苦痛。呻號叫喚。未曾休息。年漸長大。瘡皆潰爛。膿血橫流。常患疼痛。因為立字。名曰呻號。父母憐愍。設諸方藥。雖加療治。瘡無除愈。年漸長大。聞諸人語。祇桓精舍。有好良醫。善療眾病。能令除愈。尋即往至。詣祇桓中。見佛世尊。三十二相。八十種好。光明暉曜。如百千日。心懷喜悅。前禮佛足。卻坐一面。佛即為說五盛陰苦。是瘡是癰。如毒箭入心。傷害於人。皆是眾病之根本也。時呻號子。聞佛世尊說是語已。深自咎責。向佛世尊。懺悔罪咎。瘡尋除差。心懷歡喜。求索出家。佛即告言。善來比丘。鬚髮自落。法服著身。便成沙門。精勤修道。得阿羅漢果。時諸比丘。見是事已。白佛言。世尊。今此呻號比丘。宿造何業。初產之時。身有惡瘡。膿血橫流。甚可惡見。

復以何緣。出家得道。爾時世尊。告諸比丘。汝等諦聽。吾當為汝分別解說。乃往過去無量世時。波羅捺國。有二長者。各悉巨富。資財無量。因相忿諍。其一長者。大賈珍寶。貢奉與王。王納受已。讒彼長者。彼人惡心。常懷姦謀。規欲害我。唯願大王。聽我任意治彼長者。王即然可。尋至其家。執彼長者。繫縛撈答。楚毒無量。舉身傷破。膿血橫流。痛不可言。時彼長者。既得免已。深自思惟。有身皆苦。眾惡所集。多諸災禍。甚可厭惡。我於彼人。無大怨讎。橫見傷毀。乃至如此。即自思惟。詣山林中。觀察有為皆是無常。深悟解空。成辟支佛。視諸怨親。心皆平等。念彼長者。加惡於我。將來之世。墮於地獄。受大苦痛。我今當往為現神變。令彼開悟。作是念已。詣長者前。踊身虛空。作十八變。時彼長者。見是變已。深懷渴仰。倍生信敬。即請令坐。為設餽膳。種種供養。向辟支佛懺悔先罪。佛告諸比丘。欲知彼時向彼國王。讒其長者。考掠撈答者。今呻號比丘是。爾時諸比丘。聞佛所說。歡喜奉行。